

Acta da Xunta de Goberno correspondente á ordinaria do 18 de marzo de 2016

No Pazo da Deputación Provincial de Ourense, o dezaioito de marzo do ano dous mil dezaseis, ás dez horas, reúnese a Xunta de Goberno da Deputación baixo a presidencia de don Rosendo Luis Fernández Fernández (vicepresidente 1º), en substitución do titular don José Manuel Baltar Blanco, presidente da mencionada Deputación -que como tal é da Xunta-, cos deputados, don Plácido Álvarez Dobaño, dona Montserrat Lama Nóvoa, dona Ana M.^a Villarino Pardo, don Manuel Doval Soto, don Juan Anta Rodríguez e don Pablo Pérez Pérez, os que constitúen a maioría absoluta da devandita xunta, co fin de celebrar sesión ordinaria en primeira convocatoria e tratar nela os asuntos que figuraban na orde do día.

Non asiste á sesión o deputado provincial e vicepresidente 2º, don Jorge Pumar Tesouro, que escusa a súa ausencia.

Asiste a interventora, dona Mónica Legaspi Díaz, e dá fe do acto, o secretario xeral, don Francisco Cacharro Gosende.

Unha vez aberta a sesión pola Presidencia á mencionada hora, e despois do correspondente estudo e deliberación, adoptáronse os seguintes acordos:

1.- ACTA DA SESIÓN ANTERIOR, ORDINARIA, DO DÍA 11 DE MARZO DE 2016.-

Unha vez examinada a acta da sesión ordinaria que tivo lugar o día once de marzo de dous mil dezaseis, a **Xunta de Goberno** da Deputación **acordou**, por unanimidade, a súa aprobación, sen observacións.

2.- APROBACIÓN DE CONVENIO DE COOPERACIÓN ENTRE A DEPUTACIÓN PROVINCIAL DE OURENSE E OS CONCELLOS DE CENLLE, PUNXÍN E SAN AMARO PARA A PRESTACIÓN DE ASISTENCIA PARA A XESTIÓN DAS INSTALACIÓNS DE ABASTECIMENTO EN ALTA “RAZAMONDE-SAN TROCADO” DURANTE O EXERCICIO 2016.-

Unha vez visto o ditame favorable da Comisión Informativa de Termalismo, Turismo e Medio Ambiente en relación co convenio referenciado no encabezamento, supervisado pola Secretaría Xeral desta Deputación, a **Xunta de Goberno**, por unanimidade, **adopta** o seguinte **acordo**:

1º) Aprobar a subscrición do convenio de cooperación entre a Deputación Provincial de Ourense e os concellos de Cenlle, Punxín e San Amaro para a prestación de asistencia para a xestión das instalacións de abastecemento en alta “Razamonde – San Trocado” durante o exercicio 2016, con suxeición ás seguintes cláusulas:

Acta da Xunta de Goberno correspondente á ordinaria do 18 de marzo de 2016

1ª) Obxecto

Constitúe o obxecto deste convenio a regulación das condicións de prestación pola Deputación Provincial aos Concellos de Cenlle, Punxín e San Amaro do servizo de asistencia e cooperación para a xestión, durante o ano 2016, das instalacións de abastecemento en alta “Razamonde - San Trocado”, consistente na adución de auga potable constituída pola captación na marxe dereita do río Miño (encoro de Castrelo de Miño), ETAP (estación de tratamento de auga potable) de 20 l/s, bombeo en ferverza de 20 l/s a Razamonde e San Trocado, depósito de Razamonde (250 m³), depósito de San Trocado (500 m³) e rede arterial en alta.

O presente convenio adóptase en exercicio da competencia provincial para prestarlles asistencia e cooperación aos concellos e demais entidades locais en materia de servizos municipais, prevista no artigo 36.1.a) e b) da Lei 7/1985, do 2 de abril, reguladora das bases do réxime local, e da competencia municipal para a ordenación e xestión do servizo de abastecemento domiciliario de auga potable, configurado como servizo mínimo obrigatorio polo artigo 26 da mesma lei básica de réxime local.

2ª) Condicións da prestación do servizo

A Deputación Provincial prestaralles aos concellos adheridos a este convenio, durante o exercicio 2016, a asistencia técnica necesaria para a xestión do sistema de abastecemento en alta Razamonde - San Trocado, incluíndo a asistencia técnica para a xestión do seu funcionamento ordinario, a realización do seu mantemento preventivo e as obrigas de control analítico derivadas do RD 140/2003. Con respecto ao mantemento correctivo, a asistencia técnica prestada limitarase ao asesoramento e ás axudas de persoal electromecánico ou de fontanería especializado necesarias, pero non inclúe o custo de reparacións que non se poidan facer in situ, e requiran a intervención de terceiros, nin material de substitución.

Tamén quedan excluídas desta asistencia técnica o resto de instalacións do servizo municipal de abastecemento de augas en cada un dos concellos.

O servizo de asistencia será prestado pola Deputación Provincial a través da entidade Aquaourense, Sociedade Provincial de Augas e Medio Ambiente, SA, sociedade de capital mixto participada pola Deputación Provincial, na súa condición de concesionaria do servizo provincial de asistencia e cooperación con entidades locais en materia de

Acta da Xunta de Goberno correspondente á ordinaria do 18 de marzo de 2016

servizos relacionados co ciclo hidráulico e medio ambiente. Exceptúase desta previsión a asistencia para a xestión da subministración de enerxía eléctrica, que será realizada directamente pola Deputación Provincial, asumindo a contratación e pagamento da subministración, que será obxecto de repercusión aos concellos, nos termos previstos na cláusula 3ª.

En todo caso, a instalación pública obxecto desta asistencia técnica conservará en todo momento o seu carácter de infraestrutura pública intermunicipal, de titularidade compartida entre os concellos de Cenlle, Punxín e San Amaro, correspondéndolles a súa xestión aos ditos concellos, sen prexuízo da asistencia da Deputación.

3ª) Retribución económica

1. En contraprestación polo servizo prestado, a Deputación Provincial percibirá os seguintes prezos públicos:

*a) Tarifa fixa mensual pola asistencia técnica a Cenlle: **1.737,05 euros/mes** (IVE non incluído)*

*b) Tarifa fixa mensual pola asistencia técnica a Punxín: **1.085,66 euros/mes** (IVE non incluído)*

*c) Tarifa fixa mensual pola asistencia técnica a San Amaro: **1.519,92 euros/mes** (IVE non incluído)*

*d) Tarifa variable por cada m3 de auga potable que se subministre desde o sistema en alta dende a ETAP de Razamonde, a **0,1212 €/m³** (IVE non incluído); e a **0,2376 €/m³** (IVE non incluído), consumido por cada concello dende o bombeo de San Trocado.*

Ás tarifas sinaladas aplicaráselles o IVE vixente en cada momento.

As tarifas variables liquidaráselle a cada concello en función dos m3 de auga subministrados a cada un.

A Deputación Provincial aprobará as oportunas liquidacións semestrais, referidas ao 30 de xuño e ao 31 de decembro de 2016, que se lles notificarán aos concellos outorgándolles un prazo de trinta días para o seu pagamento. Nas liquidacións semestrais incluíranse as tarifas variables correspondentes ao consumo efectivo e á parte proporcional das tarifas fixas.

Acta da Xunta de Goberno correspondente á ordinaria do 18 de marzo de 2016

4ª) Comisión de seguimento

Establécese unha comisión de seguimento do convenio, que estará integrada polo deputado – delegado de cooperación (ao que lle corresponderá a súa presidencia), o director da Área de Medio Ambiente e un representante designado por cada concello, entendendo que, en ausencia de designación expresa, a dita representación corresponderalles aos respectivos alcaldes. Actuará como secretario da comisión o secretario xeral da Deputación ou funcionario que legalmente o substitúa, coas funcións propias dun secretario de órgano colexiado conforme co establecido no Título II da Lei de réxime xurídico das administracións públicas e do procedemento administrativo común.

A comisión de seguimento reunirase a pedimento de calquera das partes integrantes, e as súas funcións serán as de seguimento da aplicación do convenio, interpretación e resolución de incidencias. No caso de non acadarse un acordo no seo da comisión, a Presidencia da Deputación Provincial resolverá unilateralmente e con carácter executivo o que proceda, sen prexuízo da posibilidade de impugnación deste acto administrativo pola entidade local interesada conforme co sistema de recursos vixente no noso ordenamento xurídico.

5ª) Vixencia

O presente convenio estará vixente entre o 1 de maio e o 31 de decembro de 2016.

6ª) Extinción do convenio

O presente convenio só poderá ser resolto polo cumprimento do prazo da súa vixencia.

7ª) Natureza e réxime xurídico

O presente convenio terá natureza administrativa, correspondéndolle á xurisdición contencioso administrativa a resolución das controversias sobre a súa validez, eficacia, efectos e extinción.

2º.- Ordenar a publicación do presente convenio no BOP para xeral coñecemento.

3.- ARQUIVO DO EXPEDIENTE EXPROPIATORIO INCOADO POLA DEPUTACIÓN DE OURENSE, POR DELEGACIÓN DE COMPETENCIA DO CONCELLO DE AMOEIRO, PARA EXECUCIÓN DO PROXECTO DE AMPLIACIÓN DA RÚA COSTUREIRAS.- Unha vez visto o ditame favorable da

Acta da Xunta de Goberno correspondente á ordinaria do 18 de marzo de 2016

Comisión Informativa de Cooperación, Infraestruturas e Medio Rural, a **Xunta de Goberno**, por unanimidade, **adopta** o seguinte **acordo**:

1. Aceptar a desistencia do Concello de Amoeiro, acordando o arquivo do expediente expropiatorio incoado pola Deputación de Ourense, por delegación de competencia do devandito concello, para a execución do proxecto “ampliación da rúa Costureiras”.

2. Notificarlles o presente acordo ao Concello de Amoeiro e aos propietarios afectados polo devandito expediente.

4.- ASUNTOS DE URXENCIA.- Non se suscitaron.

5.- COMUNICACIÓNS DA PRESIDENCIA.- Non houbo.

6.- ROGOS E PREGUNTAS.- Non se formularon.

E, ás dez horas e vinte minutos, do referenciado día dezaioito de marzo do ano dous mil dezaseis, a Presidencia dá por rematada a sesión da Xunta de Goberno, e redáctase esta acta, que se asinará segundo o legalmente establecido.

O PRESIDENTE,

O SECRETARIO,